

嵩

書

嵩書卷之四

文林郎登封縣知縣傅梅元鼎撰

宸望篇

外方長曰禮稱天子祭天下名山大川五嶽視三公  
四瀆視諸侯五帝之始語不經見者遐哉不可攷已  
黃帝太室帝唐嵩高見於他書者姑存而無論虞典  
巡狩柴望之文彰彰也顧不及中嶽何哉風俗通曰  
天子所都故不言巡豈其然乎然其義可推已周穆  
王八駿所及志在盤游固無足道至漢武帝黜爲方

士所惑聞黃帝鼎湖之說於是候神太室而封禪之  
議起矣予讀史記封禪書論次自古以來用事於鬼  
神者具見其表裏因有感焉嗟呼春秋之義定哀多  
微詞太史公之隱衷豈不可識乎哉歷代以來有至  
有不至皆領於天子之祠官或具儀而備物或宣侈  
而明諂略次行事其得失可鑑也至有謬加帝號配  
之以妃抑可哂矣恭讀我

太祖釐正廟號之詔五嶽四瀆一從其山水本名洋  
洋聖訓與舜典並垂可也

上古

黃帝游于太室與神會史記封禪書云天下名山八而三在蠻夷五在中國中國華山首山太室泰山東萊此五山黃帝之所常游與神會

唐堯游于陽城楊雄河東賦云瞰帝唐之嵩高兮顏師古註曰堯曾游于陽城故于嵩高山瞰其遺蹟也

周

穆王游于太室之丘以觀夏后啓之所居乃入于啓

室見穆天子傳郭璞注云太室之丘嵩高山啓母  
在此山化爲石而后啓亦登仙故其上有啓石也  
見歸藏及淮南子

漢

武帝元狩四年帝使公孫卿候神于太室上後公孫  
卿言候神河南見仙人跡緱氏城上有物若雉帝  
親幸緱氏視之

元封元年三月帝東幸緱氏禮登中嶽太室從官在  
山下聞若呼萬歲者三問上上不言問下下不言

于是詔以三百戶封太室奉祠命曰崇高邑禁民  
無伐其山木復其民

詔載章成篇正義曰以崇奉

嵩高山故謂之崇高也又武帝內傳云帝好長生  
之術常祭名山大澤以求神仙元封元年甲子祭  
嵩山起神宮帝齋七日祠訖迺還

宣帝神爵元年詔太常制五嶽常祀禮遣使者持節  
祭嵩山

順帝陽嘉元年京師旱勅郡國二千石各禱名山嶽  
瀆遣大夫謁者詣嵩高請雨

魏

明帝太和四年八月東巡遣使者以特牛祠中嶽

北魏

明元帝泰常四年帝幸洛陽遣使以太牢祀嵩高

太武帝太延元年立廟于嵩嶽上置侍祀九十人歲

時祈禱水旱其春秋泮涸遣官率刺史祭以牲牢

有玉帛

孝文帝太和十八年帝祭嵩高

祭文曰太極分渾兩儀是生辰作乾寶嶽樹坤靈

昭彰天地吐納五精唯中挺神祥契幽經日月交  
暉寒暑遞成萬象合和兆類孳盈爰自化闕俶慶  
胥庭軒轅曜哲伊祁載形逮于有周實光洛禎川  
潛龍光山隱鳳亭三才憑微七曜依明人倫傾首  
百神柔誠造厥區夏歷茲三正應符代績孰不斯  
營曰乎皇魏飛虬玄并螭騰穹象用九黔羸新邦  
興略不猷罔清佗瓊指陰淹翠濕亭河圖曠覽升  
中闕銘朕承法統誕邀休宏開物成務載鑠成齡  
遷宇柳方闡繩墨城則直之興百堵若星日躔流



復月陸芬馨鏘旋紫宿景曜黃衡鸞聲嚶嚶和  
嚶嚶歸蓋如雲還輶若霆惟嵩嵒嵒峻極昊青惟  
邑翼翼長啓魏京薦玉告虔用昭永貞納茲多福  
萬國以寧

孝明帝熙平二年九月靈太后幸嵩山夫人九嬪公  
主以下從者數百人昇于頂中

正光三年遣有司馳祈嵩嶽

出帝永熙二年車駕幸崧高石窟靈巖寺十二月復  
狩于嵩陽

北齊

宣帝天寶元年遣使致祭于嵩嶽

孝武帝大發士卒狩于嵩山之南旬有六日時寒朝

野嗟怨中書侍郎魏收乃上南狩賦以諷焉

隋

高祖開皇十五年三月帝東巡狩望祭中嶽嵩山

唐

高宗調露元年十月帝如嵩陽觀

永隆元年二月帝如少室山

嵩書

卷四

五

宸望篇

永淳元年作奉天宮于嵩山之南

弘道元年正月帝幸奉天宮四月還都

十月帝幸奉天宮十一月還都

武后垂拱四年七月改嵩山為神嶽封其神為天中

王配為天靈妃

萬歲通天元年臘月封于神嶽改元曰萬歲登封遂

禪于少室山初高宗將封禪詔諸儒國子司業李

行偉考功員外郎賈大隱草具其儀已而遇疾不

克封至是遂登封焉

二月尊神嶽天中王為神嶽天中黃帝天靈妃為天  
中黃后

聖曆元年二月如緱氏遂如嵩陽宮

久視元年臘月如嵩山作三陽宮四月如三陽宮追  
暑至秋乃還左補闕張說有疏極諫不從疏載章  
成篇

長安元年五月如三陽宮尋武后寢疾令給事中閻  
朝隱往禱少室山乃沐浴伏身俎盤為牲請代后  
疾還奏會后亦愈大見褒賜其諂佞如此

玄宗開元十八年命祀嵩山以王禮仍封嶽神為天  
中王歲六月遣河南守至嶽下恭祀終唐無改

宋

太祖乾德元年令有司製嶽神衣冠劔履遣使易之  
乾德二年遣使祈雨于嵩嶽

開寶六年勅修嵩嶽祠廟詔縣令兼廟令尉兼廟丞  
專主祀事命翰林學士盧多遜撰碑銘紀之文載

章成篇

太宗淳化六年夏四月遣使詣嵩嶽禱雨

真宗景德四年春帝如西京還車駕次鄭州遣使祀中嶽及啓母少姨廟

大中祥符四年春二月帝有事于汾陰還經洛陽望祭嵩嶽

五月詔加五嶽尊號遣冊禮使攝太尉右諫議大夫陳彭年副使攝司徒光祿少卿沈繼宗奉玉書衮章加上中嶽號曰中天崇聖帝中嶽后曰正明后命翰林禮官詳定儀注及冕服制度崇飾神像之禮以州長吏以下充祀官致祭

祭告樂章曰鍾石既作俎豆在前雲旗飛揚神光  
肅然當駕颺歛來乎青圓言備緦禮享茲吉蠲右  
迎神節彼喬嶽神明之府秩秩威儀肅肅雲宇懿  
號克崇庶物咸覩帝藉升名式綏九土右冊入門  
巖巖神嶽作鎮中央肅奉徽冊尊名孔章聿降颺  
駕載獻蘭觴熙事允洽寶祚彌昌右酌獻祗薦鴻  
名寅威明祀有楚之儀如在之祭奠獻既終禮容  
克備神鑒孔昭福禧來暨右送神

天安殿冊封樂章曰名嶽奠方帝儀先舉吉日惟

良九賓咸旅溫王縷文纁裳正宇禮備樂成薦神之祐

七年九月命翰林學士王曾撰碑銘紀冊禮中嶽之

事

文載章成篇

八年二月皇帝醮告于嵩山自製醮告文即建壇之地構亭立石柱刻文其上

文曰皇帝稽首言伏以列辟之規有邦之典必依憑于神化用保佑于生民禮存大享之言書著咸秩之訓上下之祀必在於交修人神之紀乃臻于



多福所以勵明誠于鑒寐奉嘉薦于苾芬庶使不  
測之靈誕昭于忽恍無疆之應允洽于希微竊念  
猥以眇躬紹茲大寶荷監觀于穹昊承積累于祖  
宗致百福之來同由三神之儲祉向自交馳玉帛  
倒載干戈尉候聊存風俗無外古先盛德之事罔  
不繁興圓清眷祐之心由其丕顯發春戒序吉日  
協期夕夢先通秘文嗣降旣而徇鄒魯之望幸脩  
云岱之上封綠錯之圖疊承于錫羨紫煙之燎言  
獲于升中以至輯至于魏雎旋軫于邾鄆歟后祇

而躬祈穡事朝山園而再展孝思飈馭下臨璿源  
逖悟珍臺肇葺寶宇奉安將以伸遙追罄軋鞏定  
國陽之位方答乎天祺詣渦曲之庭先朝乎道秘  
歷平臺而駐蹕尊藝祖而建都盛則繼揚彌文悉  
舉率土脩貢輿誦多歡律呂回環未盈七載禮容  
首冠俄已三成自先置之辰汔飲至之日鴻猷景  
鑠旣已有融美貺禎圖抑復無筭爾乃甘泉滋液  
神草紛披珍木交柯靈禽接羽喬雲炳蔚嘉氣氤  
氲日月揚于榮輝星宿應于瑞璫考于曩古蓋墳

史之未傳萃于方今乃耳目而咸熟至若齊璇璣  
之七政和玉燭之四時通範圍之書文惠海域之  
黎獻千倉之積盈儲峙于大農三尺之繁措刑辟  
于司寇顧惟眇薄成此治平故仰報于百靈用永  
安于九寓乃詢甲令于掌禮之官乃訪秘科于脩  
真之士載念始繕儀于岱嶽俄飲至于譙都或豐  
厥牲牲或絜斯蘋藻或崇壇而斯建或靖館而斯  
臨雖復欽翼內增齋明上達然而茫茫曾宙杳杳  
方輿其載無聲其功不宰高也明也豈裨竈之所

詳知經之緯之豈豎亥之所徧步穹壤之表非一  
以臆論鬼神之形莫諧乎縷見寒門所會旣秩序  
而靡彰塗山所朝亦疆宇而曷識璇臺珠闕邈處  
于鴻濛之中金簡琅函莫盡于杳冥之際其有默  
熙妙用幽贊丕功或命歷之云毗或造化之攸輔  
烈風迅雨仰其節宣精氣遊魂資其陶冶或高處  
于清都紫府或下居于名山秘洞或德及庶物世  
罔之聞或力濟群生人弗之諭雖茂承于純嘏而  
終闕于豐裡茲謂弗欽何伸大報由是內懷顯若

遠考徧于廣達，夤威以醕，况施矧復載稽地志，緬眺靈區，挺喬嶽以奠方，號下都而分治，神鄉福地，咸紀寶章，乘煙御風，常廻歛駕，是以擇陽和之序，瞻峻極之峰，祇遣輜車，遐脩醮席，縷形善禱，罄達至虔，夫國之所保者，民民之所尚者，生生之所切者，食食之所豐者，歲儻或疵癘，靡作富庶，允登壽考，可期順成，常洽然後八荒之外，俗變風移，九服之中，導德齊禮，衣冠不異，何止于緩刑文告，靡施孰煩于用武，是則天之祐也，神之顧也，敢不勵乃

志懲乃心以保乎盈成以戒乎逸豫兢兢為務庶  
協于永圖翼翼在懷實期乎來格無任懇倒之至  
謹告

仁宗慶曆三年遣使詣嵩嶽祈雨

神宗熙寧元年望祭中嶽

祭告樂章曰維土作德維帝御行含養載育萬物  
以成有嚴祀典薦我德馨神其歆止永用億寧右  
迎神紳褱檐兮玉珮縈兮于我將事神燕喜兮帝  
命望祀敢有不共往返于位肅肅雍雍右升降祀

以崇德幣則有儀肅我將事登降孔時精明純潔  
罔有弗祗史辭無媿神明來娛右奠玉帛高廣融  
結實維中央宣氣報功利彼一方坎壇以祀六樂  
鏘鏘靈其有喜酌以大璋右酌獻言旋其處以奠  
中域無替厥靈四方是則神永不息祀永不愆以  
享以報千萬斯年右送神

高宗紹興十四年望祀中嶽令有司製嶽神衣冠劔  
履遣使易之

祭告樂章曰天作高山屹然中峙經營厥宇萬機

咸遂火熙土王爰舉時祀繩繩宣延彷彿來止右

迎神思來感格肅雍不忘禮儀既備濟濟蹌蹌潔

蠲致敬往薦其方交若有承神兮孔饗右初獻盥

洗升降練日有望高靈來下何以告誠心惟物假

有筐斯實有寶斯藉于以奠之神光燭夜右奠玉

帛與天齊極伊嵩之高顯靈效異神休孔昭飭我

祀事實俎鸞觥以侑旨酒其馨有椒右酌獻禮樂

既成肅容有常奄忽消搖申畢重觴仰臚所求降

福滂洋師象山則以況皇章右亞終獻虞至旦兮



靈亦有喜蹇欲驤兮象輿已轆粥音送兮靈聿歸  
以長無極兮錫我以祉

右送神

金

世宗大定四年祭中嶽于河南府十四年勅修其廟  
至二十二年廟成命翰林待制黃久約撰碑

文載

章成篇

元

世祖至元三年六月遣祀嵩山于河南府境

五年六月遣使王沂祀中嶽

二十八年加上中嶽爲中天大寧崇聖帝

詔曰朕惟名山大川國之秩祀今嶽瀆四海皆在  
封宇之內民物阜康時惟神休而封號未加無以  
昭答靈貺可加上中嶽中天大寧崇聖帝仍遣官  
詣祠致告以稱朕敬恭神明之意命玄教宗師張  
留孫必闡赤養哥齋奉錦旛香帛致祠下

仁宗延祐六年春皇太后遣侍臣齋楮幣詣中嶽設  
醺

順帝至正九年春遣內臣資善大夫宣政院使伯顏

忽都馳驛奉錦幡白金銀盒祀中嶽

十四年春正月遣使奉香幣祀中嶽

二十五年遣翰林應奉李國奉代抵汴路即城中望  
祭中嶽

大明

太祖高皇帝洪武三年釐正神號有詔嶽鎮海瀆並  
去其前代所封名號止以山水本名稱之嵩山稱  
中嶽嵩山之神七月遣典寶彭恭祭告

御製祭文曰磅礴中國之中參穹靈秀生同天地形

勢巍然古昔帝王登之察地利以安生民故祀之  
曰嵩山於敬則誠於禮則宜自唐始加神之封號  
歷代相因至今曩者元君失馭海內鼎沸生民塗  
炭予起布衣承上天后土之命百神陰佑削平暴  
亂正位稱尊職當奉天地享鬼神以依時統一人  
民法當式古今寰宇旣清特修祀儀因神有歷代  
之封號予起寒微詳之再三畏不敢效蓋神與穹  
壤同始靈鎮中央其來不知歲月幾何神之所以  
靈人莫能測其職必受命于上天后土爲人君者

何敢預焉予慎不敢加號特以中嶽高山名其名  
依時祀神惟神鑒知

十年八月遣中山侯湯和致祭中嶽

御製祭文曰予荷上天后天土之眷命蒙神之效靈以  
致平群雄息禍亂君主黔黎于華夏統控蠻夷于  
今十年中國康寧然于神之祀若以上古之君言  
之則君爲民而禱載有春祈秋報之禮于斯之祀  
有望于神而祭者有狩于所在而燎瘞者今予自  
建國以來十年于茲國爲新造民爲初安是不得

親臨所在而祀神也特遣開國功臣湯和道士陳  
玉京劉崇玄以如予行奉犧牲祝帛于祠下以報  
效靈自今以後歲以仲秋詣祠致祭惟神鑒知

十二年八月遣使鄭允存致祭中嶽

祭文曰惟神鍾秀嵩高中山巨鎮封表有年功養  
民社時維仲秋禮當報祀特命使者奉犧牲祝帛  
詣祠致祭

二十八年七月以征廣西蠻夷酋長遣國子監生祭  
告中嶽

御製祭文曰昔者元運將終英雄並起民受其殃時  
予亦與群雄並驅輯兵保民上帝默相山川受命  
效靈所在必克轉戰五年餘方乃兵偃民息衆樂  
生生之計天下太平二十八年今洪武乙亥四月  
間廣西布政司報蠻夷酋長龍州趙宗壽奉議州  
黃世鐵不循治化負固殃民兵興之事本重旣行  
不敢不告所以告者兵行十萬各離父母妻子途  
間饑飽勞逸山嵐瘴氣染患者有之此兵行之難  
兵入其境良民受害荆棘生焉民驚且移未有不

傷此其所以告也其所以告者但願瘡瘍之方化  
煙嵐爲清涼之氣早殄渠魁良善安業軍士速回  
各得完聚以養父母是其禱也然予未敢徑告上  
帝惟神鑒之爲予轉達

三十年九月以征西南苗夷遣使祭告中嶽

成祖文皇帝即位遣使姜士暄祭告中嶽

洪武三十五年七月

祭文曰惟神職司中央掌天地中和之氣雨暘時  
若災沴不興神功有焉載在祀典歷代咸尊惟我  
太祖高皇帝以神武定天下崇奉禮祭洋洋感格三



十餘載黎庶雍熙建文昏愚姦臣竊柄神明弗佑  
四海離心朕奉

祖訓來清群惡荷天地山川之靈戰無不捷堂堂之  
陣直抵京師豈期建文闔宮自燼朕以諸王大臣  
再三推戴於六月十七日躬即帝位嗣守

高皇帝大業旣已昭告于天地社稷必當徧告于名  
山大川茲特遣官祭以牲醴惟神有知體朕至意  
尚祈靈佑助我

皇明

永樂四年七月以征安南遣監生李庸祭告中嶽

祭文曰昔者姦臣構禍屠害諸王以及于予不得已以兵救民賴皇天眷祐嶽鎮海瀆效靈獲定內難遂安宗社爰自即位以來休息黎庶普天率土均視同仁今安南賊人黎季犛及子黎蒼驕盈兇悖屢犯邊疆首侵思明府祿州等處地方予爲寬容不肯興師問罪但遣使諭使還地黎賊巧詞支吾所還之地多非其舊還地之後復據西平州逼脇命吏又侵寧遠州地方占管人民殺擄男女邊

境之人數年之內罹其荼毒豈可勝言况安南之人受其禍害不遺一家占城之地被其劫掠已踰數歲遣人告諭冀其改過罔有悛心益驕益盛予為天人之主恭天成命安忍坐視民患而不之救今特命將出師聲罪致討實出予之所不得已心在救民豈敢用兵尚念兵士遠行離其父母妻子山川險阻嵐瘴鬱蒸跋涉勞勤易于致疾予惟念此溪用不寧萬冀神靈鑒予誠悃聞于上帝賜以洪庥潛消瘴癘大振兵威早殲渠魁永安遐壤今

年七月十六日兵行特遣人致香幣牲醴先詣神  
所謹告

五年五月以平安南遣監生屈伸祭告中嶽

仁宗昭皇帝洪熙元年二月以即位遣大理寺右寺  
丞楊復祭告中嶽

祭文曰巖巖嵩嶽永鎮中土時出雲雨用育萬物  
嗣位之初聿嚴告祀翼我皇祚尚賴神庥

宣宗章皇帝宣德元年三月以即位遣右都御史王  
彰祭告中嶽

祭文曰惟神永奠中土阜成民物參贊之功國有  
賴焉予嗣位之初特用祭告神其昭鑒惠我邦家  
十年五月以祈年遣登封縣知縣梁成致祭中嶽

祭文曰予新嗣祖宗大位統理下民夙夜惓惓養  
民爲務尚祈神靈陰隆助相俾雨暘時順災沴不  
生百穀用成民用康濟國家清泰永賴神庥謹以  
香幣達予至誠惟神鑒格

英宗睿皇帝正統元年正月以即位遣使祭告中嶽  
祭文曰惟神巍巍喬嶽奠茲中土民物育成允賴

神化予嗣承大統祇嚴祀禮惟神歆格永祐群生  
二年五月以祈年遣登封縣知縣孫謙致祭中嶽  
祭文曰朕祇御下民永懷保恤百穀長育茲惟厥  
時顓冀明靈特隆敷祐無災無沴時雨時暘作歲  
豐穰以穀黎庶

九年四月以大旱禱雨遣翰林院編修薩琦致祭中  
嶽

祭文曰予奉天育民愧涼于德致茲久旱災及群  
生夙夜省躬中心惓切神司方嶽憂憫諒同雨暘

以時宜任其責特茲致禱尚冀感通弘布甘霖用  
臻豐稔匪予之惠時乃神庥

景皇帝景泰元年閏正月以即位遣給事中奚倫祭  
告中嶽

祭文曰越茲中土嵩嶽惟崇民物奠安厥功允茂  
予嗣承大統謹用祭告惟神歆格永祐家邦

四年三月以多雨雪遣右副都御史王暹祭禱中嶽  
祭文曰惟神奠鎮茲土以庇利爲職比聞連歲伏  
陰雨雪過多農事難舉人民乏食困憊不勝朕心

憫惻此固朕之不德所致然念朕與神受育民之  
責于天其任惟均而神則又獨司陰陽闔闢之機  
物理變化之運忍令此沴爲民病乎咎固當歸于  
朕神亦焉得而辭故敢以告尚冀神庥大布陽和  
之惠溥成發育之功專候感通以慰輿望

四年七月以旱及河決遣翰林院編修吳匯祭禱中  
嶽

祭文曰國以兵民爲本兵民以食爲天仁政所先  
孰加于此方秋百穀將實重以漕運方殷雨澤罕



言  
數河流多決兵民所望疇當副之夫朕爲國子民  
而神爲民捍患實皆天職然有司存朕所能爲豈  
敢畏難于朝夕神之易舉詎可辭勞于指麾沛膏  
雨以作豐年助順流而爲通道願有禱也冀無負  
焉

五年四月以祈年遣給事中何陞致祭中嶽

祭文曰茲者農務方殷所憂旱澇豐歉所係尤切  
朕心神主茲方計不異此雨暘時若其職在神尚  
運神機俾從民欲民苟遂豐登之願神益彰庇利

之仁專俟感孚以慰虔禱

六年閏六月以旱災祈禱遣左副都御史馬謹致祭  
中嶽

祭文曰恭承天命重付眇躬民社所依災祥攸繫  
志恒內省政每外乖茲者雨澤不敷河流欠浹舟  
舡淺滯禾稼焦萎災患由臻公私所病窮惟所自  
良有在茲然因咎致災固朕躬罔避而轉患為福  
實神職當專夫有咎無福過將惟一而轉患為福  
功孰與均特致懇祈幸副懸望

天順元年二月以復辟遣通政司參議兼翰林院侍講劉定之祭告中嶽

祭文曰嵩高維嶽表茲中土奠安民物厥功茂焉予復正大統謹用祭告惟神歆格永佑家邦

憲宗純皇帝成化元年三月以即位遣給事中袁愷祭告中嶽

祭文曰惟神毓秀鍾靈永表中土奠安民物萬世允賴茲予嗣承大統謹用祭告神其歆鑒佑我國家

四年五月以祈年遣河南左布政使孫遇致祭中  
祭文曰比歲以來多方災沴雨暘不時我民用瘁  
民之瘁矣予曷為懷神矜于民忍降以災德澤崇  
渙就與神侔祈贊化機溥天之休責躬修行予敢  
弗篤庶幾與神同作民福

十三年五月以災異遣右副都御史張瑄祭禱中嶽  
祭文曰國家敬奉神明聿嚴祠祀所期默運化機  
庇佑民庶乃近歲以來或天時不順地道不寧或  
雷電失常雨暘爽候或妖孽間作疫癘交行遠近

人民頻遭饑饉流離困苦痛何可言惕然于衷罔知攸措惟神奠鎮一方民所恃賴觀茲災沴能不究心是用特具香幣遣官祭告尚冀體上帝好生之德鑒予憂憫元元之意幹旋造化弘闡威靈捍患禦災變禍爲福庶幾民生獲遂享報無窮惟神鑒之

二十年三月以大旱及地震遣右副都御史趙文博祭禱中嶽

祭文曰朕在位二十餘年禮神恤民夙夜在念

去秋至冬雨雪全無方今春首地震京師年麥無  
收成之望士民懷艱窘之憂朕心惻然惓切曷已  
惟神奠安中土作鎮一方久享民祀寧不究心茲  
特遣人敬齎香幣用告于神尚冀弘闡明靈參贊  
造化默奪潛消俾雨暘時若物阜民康宗社奠安  
而神亦血食永永矣

二十三年六月以旱禱雨遣兵部右侍郎呂愛致祭  
中嶽

祭文曰今歲自春及夏天時亢旱雨澤不降田苗

枯槁黎庶憂惶予甚兢惕側身修省虔致禱祈惟  
神矜民寧不旋幹大霈甘澤以滋禾稼以濟民艱  
庶民有豐稔之休則神亦享無窮之報

孝宗敬皇帝弘治元年四月以即位遣武安侯鄭英  
祭告中嶽

四年四月以旱禱雨遣太常寺少卿李璋致祭中嶽  
六年四月以旱禱雨遣右副都御史徐恪致祭中嶽  
十年四月以旱禱雨遣右副都御史陳道致祭中嶽  
祭文曰自去冬及今春以來亢旱爲虐雨澤少降

麥苗枯稿田野荒蕪黎庶憂惶予甚兢惕側身循  
省虔致禱祈惟神矜民幹旋造化大霈甘澤以濟  
民艱庶年穀有豐稔之休則神亦享無窮之報

武宗毅皇帝正德元年五月以即位遣鴻臚寺卿楊  
瑢祭告中嶽

四年二月以旱禱雨遣河南布政司右參議詹璽致  
祭中嶽

祭文曰今歲以來雨暘愆候田苗枯稿黎庶憂惶  
予心兢惕虔致禱祈惟神矜民旋幹太和式調和



氣以濟民艱庶民有豐稔之休神亦享無窮之報  
六年十月以寧夏平水旱盜賊交作遣河南布政司  
右參政胡拱致祭中嶽

祭文曰去歲以來寧夏作孽命官致討逆黨就擒  
內變肅清中外底定匪承洪佑曷克臻茲因循至  
今未申告謝屬者四方多事水旱相仍餓莩載途  
人間困苦盜賊嘯聚勦捕未平循省咎由實深兢  
惕伏望神慈昭鑒幽贊化機災沴潛消休祥協應  
佑我家國永庇生民

八年四月以盜賊水旱災異遣河南布政司右參議董銳祭禱中嶽

祭文曰近歲以來群盜爲梗生靈被害在在有之命將徂征稍臻平定餘災未殄尚累天和水旱相仍妖祥疊見永思厥咎良切疚心爰與群臣飭躬修政同期昭格庸迓神庥伏冀神明憫茲黎庶轉災爲福綏我邦家不勝惓惓懇禱之至

世宗肅皇帝嘉靖元年四月以即位遣太常寺少卿張衍瑞祭告中嶽

八年五月以災異遣河南按察司僉事李順孫祭禱  
中嶽

祭文曰朕奉天命子育萬民所冀歲穩時和災患  
不作惟神是賴茲者各處旱乾火災疫癘流行變  
異非常人民流離死亡者衆廷臣以告朕心惻然  
惟神廟食茲土作鎮一方見此困窮寧不矜憫用  
是命官齋捧香帛特遣守臣潔齋備儀詣祀致祭  
爲民請命伏望明神大彰靈應潛斡化機時賜雨  
澤用消凶沴變儉歲爲豐年躋貧閭爲壽域庶稱

朕奉天子民之意中心懇切惟神鑒知

九年六月以災異遣右副都御史徐讚祭禱中嶽  
祭文曰比歲各處山崩地陷產妖隕星水旱蝗虫  
火災疫癘人民流殍變異非常沴降自天朕心憂  
懼惟神司鎮茲土利濟一方覩斯困窮寧不矜惻  
遣齋香帛特命撫臣備儀致齋潔誠申禱伏望明  
彰靈應幹旋化機時賜雨暘潛消災變豐年有望  
澤我民生庶免朕愆神其鑒庇

十一年六月以祈嗣遣河南府知府范鏞致祭中嶽

祭文曰惟神鍾靈孕秀鎮奠一方陰翊國家其來  
尚矣朕以寡昧恭承天命十有一年于茲敬事神  
祇罔敢少懈顧儲宮未立恒切于懷茲者特具牲  
帛醴齊遣官虔禱伏望茂著神功錫予元嗣則我  
國家綿慶禔于無窮而神亦享福祚于有永矣

十七年七月以誕生元子遣河南府知府張承恩祭

謝中嶽

祭文曰比歲嘗命官禱嗣于神昨丙申孟冬之吉  
仰荷天賜元儲亦神所贊佑者茲用致謝神其鑒

歆而永惟默佑焉

三十三年五月以凶荒災異遣右副都御史鄒守愚  
祭禱中嶽

祭文曰朕奉天命子育萬民所冀歲稔時和災害  
不作邇者各處地方水旱兵荒人民遭厄危亡載  
路災變異常朕心憂惕惟神上奉帝命奠位一方  
諒垂矜憫爰命潔士齋捧香帛特遣撫臣備儀竭  
虔詣祠致祭所冀明神大彰靈應潛幹化機俾氣  
序順調雨暘時若弭解災剗溥資豐泰庶同朕奉

天子民之意而神亦享祀于無窮矣

四十年八月以萬壽聖節遣右副都御史蔡汝楠祭  
禱中嶽

祭文曰惟予嗣續丕圖仰承帝眷恢張治化乂寧  
邦家匪資神力匡扶曷克導迎景貺茲今八月初  
十日寔為初度之辰命官齋捧香帛前詣祭告惟  
神鎮奠一方耀靈炳績冀永贊天錫佑輯福眇躬  
集慶凝祥以延萬載之庥

四十三年八月以萬壽聖節遣戶部右侍郎兼右僉

都御史遲鳳翔祭禱中嶽

祭文曰予上承天保六甲開昌下撫坤圖百神受  
職茲八月初十日乃予初度之辰爰命觀士齋捧  
香帛前詣祭告惟神凌霄奠域拱祚衛邦所冀裒  
祥歛福永固壽基以崇大慶于一人以普隆庥于  
萬宇

穆宗莊皇帝隆慶元年十月以即位遣都督周于德  
祭告中嶽

祭文曰惟神受命昊帝永表中土布氣宣和民物



允賴茲予嗣續丕圖謹用祭告神其歆鑒以保定  
我億萬年隆慶之基

今皇帝萬曆元年四月以即位遣光祿寺寺丞岳相  
祭告中嶽

祭文曰惟神受命昊天永表中土布氣宣和民物  
永賴茲予嗣續丕圖謹用祭告神其歆鑒以保定  
我億萬年無疆之基

十五年二月以旱災遣河南巡撫右副都御史衷貞  
吉祭禱中嶽

祭文曰比者雨暘不時災沴疊見爲民請命責在  
朕躬特茲遣官虔伸祈禱惟神默鑒率職效靈拯  
民艱食之災錫國有年之慶

臣梅  
恭讀

列聖有事中嶽祝文自釐正神號外嗣統御極則有  
祭兵興奏凱則有祭祈年禳災則有祭

天子臨軒而遣之使臣持節而行之非爲國祝釐則  
爲民請命禮從義肇疏密不常其他一切春祈秋  
報之儀聽有司歲時自率其職不以

君命將之矣雖以

肅皇帝享國綿長篤隆齋祀而禱祠祝齡之舉亦不  
再三瀆焉敬而能遠書而可法其視前代繆飾  
文誣神勞衆祗導侈而明諂者相去不天地懸隔  
哉謹綴數詞末簡俾後人知

本朝度越前代者非復一事也

門人

傳性良  
崔冲奎

校字

嵩書卷之四終

嵩書卷之五

文林郎登封縣知縣傅梅元鼎撰

嶽生篇

外方長曰人之生衆矣從古以來與草木鳥獸同生  
滅者至無筭矣上下數千年計代以數可得而屈指  
也聖賢豪傑皆間氣所鍾申甫之生歸於嶽降語曰  
地靈人傑豈不互爲倚藉哉蓋予嘗登嶽矣登已高  
矣左右四顧尚巍巍然山在其上也其若處名賢之  
側乎許由不受堯禪而巢父樊仲競抗高節故曰一

夫善射百夫決拾西伯居岐胥附奔奏先後禦侮爲之四鄰孔子生於尼丘齊魯之間文學比於天性人之重於地也豈不彰彰哉爲嶽所生之人者嶽實藉之欲毋顯得乎

陶唐

許由

許由字武仲陽城人隱於沛澤之中堯聞之致天下而讓焉由辭曰爲天下之不治與而旣已治矣鷦鷯巢林不過一枝偃鼠飲河不過滿腹惡用天下遂之

箕山之下潁水之陽耕而食終身無矜天下之色及  
歿葬於箕山後世遂名曰許由山一說堯之讓由也  
由以告巢父父曰汝何不隱汝形藏汝光若非吾友  
也擊其膺而下之由悵然不自得乃過清泠之水以  
洗其耳拭其目曰嚮聞貪言負吾友遂去終身不相  
見

張華博物志稱司馬遷云無堯以天下讓許由事  
揚雄亦云誇大者爲之樓賜叔愛日抄云從來人  
以莊周盡是寓言却不曾演攷如堯讓許由依舊  
是有此人蓋申呂許甫皆四岳之後許由亦其一  
也以當時咨四岳觀之則堯有讓四岳事但周之  
言文飾過當耳左傳云夫許太岳之後杜注云堯

四岳則太岳非由乎高士傳堯名許由為九州長  
豈即岳之任歟按伯夷傳太史公云箕山有許由  
塚是不疑為無是人矣古人之名不見於六藝何  
止由光而統欽茂之耶楊誠齋有詩子雲到老不  
曉事不信人間有許由  
子雲之見議於人宜矣

### 巢父

巢父與許由為友嘗以樹為巢而處其上故號巢父  
堯以天下讓許由巢父聞之以為污乃臨池而洗其  
耳池主怒曰何以污我水池主蓋即樊仲父也一說  
許由不受堯讓洗耳於潁水巢父牽犢欲飲之見由  
問其故對曰堯欲名我為九州長惡聞其聲是故洗

耳巢父曰子若處高岸深谷人道不通誰能見子子故浮游欲聞求其名譽污吾犢口即牽犢上流飲之

### 樊仲父

樊仲父與巢許同時人飲牛河上見巢父洗耳怒污其水乃牽牛飲於上流曰恐污吾牛口也

按漢紀載朱寵為潁川太守以正月歲首宴賜群吏問公曹吏鄭凱曰聞貴郡山川多產奇士前賢往哲可得聞乎對曰鄙郡炳嵩山之靈受中嶽之精是以聖賢龍蟠俊乂鳳集昔許由巢父耻受堯禪洗耳河濱樊仲父志潔心遐賤天下之重俱出陽城由此觀之三人皆嵩產也

周



甫侯

甫侯亦稱呂侯穆王之司寇也時穆王耄荒侯恐其重行刑罰故作呂刑訓王用贖罰之刑功加百姓為周賢臣詩曰維嶽降神生甫及申維申及甫維周之翰蓋尹吉甫美申伯而並及甫侯也甫侯未知其國所在詩及禮記作甫尚書與外傳作呂三山林氏曰呂與甫猶荆與楚商與殷也

申伯

申伯姜姓侯爵國於申今南陽有申城是其國也以其為方伯故稱申伯實宣王母舅嘗出封於謝尹吉甫作嵩高之

詩以叙其功業而送之

顓孫師

顓孫師字子張陽城人見鄭玄目錄少孔子四十八

歲

秦

陳勝

陳勝陽城人字涉少時嘗與人傭耕輟耕之壟上悵然久之曰苟富貴無相忘傭者笑而應曰若為傭耕何富貴也涉大息曰嗟乎燕雀安知鴻鵠之志哉秦

二世元年乃自立為楚王都於陳後為其御莊賈殺  
以降秦謚曰隱

漢

### 王霸

王霸字元伯潁陽人少為獄吏常慷慨不樂吏職父  
奇之遣西學長安漢兵起光武過潁陽霸率賓客上  
謁曰將軍興義兵竊不自知量貪慕威德願充行伍  
光武曰夢想賢士共成帝業豈有二哉遂從擊破王  
尋王邑於昆陽及光武為大司馬以霸為功曹令史

從度河北賓客稍稍引去光武謂霸曰潁川從我者  
皆逝而子獨留努力疾風知勁草及王郎起光武在  
薊郎移檄購光武令霸至市中募人將以擊郎市人  
皆大笑舉手邪揄之霸慚懔而還光武即南馳至下  
曲陽傳聞王郎兵在後從者皆恐及至虜沱河候吏  
還白河水流澌無船不可濟官屬大懼光武遣霸往  
視之霸恐驚衆欲且前阻水詭曰冰堅可渡官屬皆  
喜遂前比至河河冰亦合乃令霸護渡未畢數騎而  
冰解光武謂霸曰安吾衆得濟免者卿之力也以爲

軍正爵關內侯後以功定封淮陵侯

### 祭遵

祭遵字第孫潁陽人少好經書家富給而遵恭儉惡衣服喪母負土起墳嘗爲部吏所侵結客殺之縣中皆憚焉及光武破王尋等還過潁陽遵以縣吏進見愛其容儀署爲門下史尋爲軍市令舍中兒犯法遵格殺之光武怒欲收遵主簿陳副諫曰明公常欲衆軍整齊今遵奉法不避是教令所行也乃貸之以爲刺姦將軍詔諸將曰當備祭遵吾舍中兒犯法尚殺

之必不私諸卿也尋拜為偏將軍從平河北有功拜  
征虜將軍定封潁陽侯卒謚曰成

### 祭彤

祭彤字次孫遵之弟早孤以至孝見稱光武初以遵  
故拜黃門侍郎常在左右及遵卒無子帝追傷之以  
彤為偃師長使近遵墳墓四時奉祠之彤有權略視  
事五歲縣無盜賊課為第一遷襄贛令有異政拜遼  
東太守鮮卑萬餘騎入寇彤率數千人擊破之敵人  
震懾不敢窺塞後又招誘鮮卑屢擊匈奴邊無寇警

鮮卑烏桓並入朝貢彤之威聲暢於北方彤在遼東  
幾三十年徵為太僕後以罪免卒遼東吏人為立祠  
四時奉祭焉

杜密

杜密字周甫陽城人為人沈質少有厲俗志為司徒  
胡廣所辟稍遷代郡太守三遷太山太守所至有聲  
行春到高密縣見鄭玄悅之召署郡職遂遣就學後  
密去官還家為太守王昱所重桓帝徵拜尚書令遷  
河南尹轉太僕黨事起免歸本郡與李膺俱坐而名

行相次故時人亦稱李杜焉後坐黨事被徵自殺  
北魏

### 韓褒

韓褒字弘業其先潁川陽城人也少有志尚好學而  
不守章句及長涉獵經史演沈有遠略魏建明中起  
家奉朝請遷大中大夫尋避亂於夏州時太祖爲刺  
史素聞其名待以客禮大統初遷行臺左丞後累遷  
官至驃騎大將軍開府議同三司進爵爲公至天和  
三年轉鳳州刺史尋以年老致仕五年拜少保褒歷



事三帝以忠厚見知高祖深相敬重以師道處之卒謚曰貞

唐

### 李中敏

李中敏字藏之潁陽人系出隴西元和中擢進士第性剛峭以文辭氣節相尚由江西觀察判官入拜侍御史鄭注誣逐宰相宋申錫天下以目太和六年大旱詔詢所以致雨者中敏時以司門員外郎上言昔東海誤殺一孝婦大旱三年宋申錫位宰相生平勁

正姦人忌之陷不測之辜獄不參驗銜恨而沒天下  
士皆指目鄭注臣知申錫必訴於上帝天之降災殆  
有由然何惜斬一注以快忠臣之魂則天且雨矣帝  
不省中敏以病告歸潁陽注誅遷諫議大夫再遷給  
事中以言忤仇士良復棄官去開成末為發魏三州  
刺史卒於官

宋

### 王忠民

王忠民潁陽人幼通經史自靖康以來數言邊方利

害於朝屢召弗至高宗渡江忠民隱居不出諸鎮翟興等皆重之弗能致張浚授以迪功郎不受興徙治藥川忠民避地南下遇商虢鎮撫使董先於內鄉留軍中事以師禮時劉豫僭立忠民作九思圖及定亂四策達之金主及鏤板印圖散於僞境以明天下之義紹興三年翟宗薦其忠節於朝特授宣教郎忠民上疏辭官言臣憤金人無道故三上金主書乞還二帝本心報國非冀名祿上不許忠民以詰置牘中藏七寶山下力懇求去復依董先軍中遂不出

范弇

范弇學究居嵩山之小市曰金店古貌性直君子人也鄰有酒肆弇題詩云飲酒二升糴麥一斗磨麵五斤可飽十口遇歲時歌樂喧集鄉人競觀弇閉戶讀書自若也又作戒訟詩有羸猶賣牛之喻言雖俚鄉人畏而服之

見王逵過庭錄

大明

范讓

范讓字謙甫登封人童州時負奇識不與凡流伍潛

心經史閉戶誦讀鄉里高其行洪武初以明經薦遊太學所締交皆一時名士聲譽益起仕至通政司左參議在官廉慎不受私謁卒之日家無餘貲令祀鄉賢

### 李榮

李榮登封人姓資明敏讀書過目輒能成誦博極群書為文不事雕刻而太義了了洪武中以儒術舉擢鳳陽府知府為政敦尚教化弗任刑威有循良之譽未幾解組歸田以壽考終

## 傳文

傅文字公器登封人正統中第進士授戶部主事居錢穀之司以廉潔自勵奉差榷稅潁墅關一切羨緡悉籍上之毫釐不潤私橐遷南京刑部員外郎曹務簡寂益肆力於墳典以吟詠自娛考滿赴都便道過里暴疾卒於家子孫鬻其衣以葬嵩山諸勝多有遺詩惜方進而遽沒也

## 李錫

李錫登封人以貲入國子監正德三年授浙江嘉善

縣主簿六年江西姚源洞土寇王浩八等作亂所至  
焚劫浙鄰境戒嚴會兵討之八年春錫奉檄隨同知  
伍文定等駐兵華埠應援錫與指揮張琳分領左哨  
三月初八日大戰追賊過溪至埕田立砦賊不敢動  
十五日復與賊戰錫手斬三級賊忽決水兼雨作溪  
漲戎馬還潭被擒錫不屈以頭觸賊遂遇害事聞勅  
贈嘉善知縣廕一子為太學生

### 王中

王中登封布衣也蚤喪父事孀母二十餘年不怠及

母歿廬于墓側就墳傍高原鑿井資汲淡而無水  
拜禱泉忽湧出人皆異之朝暮蔬食括髮不梳衣履  
敝壞不易三年如一日也洪武十六年有司上其事  
詔旌表其門

語云溪山大澤實生龍蛇地氣所鍾人固有之詩  
所以詠嵩高也然以窘于文獻三代而後逸其名  
與事者多矣他姑無論即如胡元安體曾參之至  
行履樂正之純業喪親泣血骨立形存精誠洞于  
神明雉兔集其左右出于潁陽此鄭凱對朱寵之



言也而史臣不爲立傳無所攷其家世歷履由此推之前代之事其挂一漏萬可勝道哉幸明興未遠故老可詢予叨牧此方搜羅前徽往烈即甚微者亦備載邑乘中至若焦太僕之名德崔憲副之仁孝足稱郡國表儀予式閭已久一則壽考未艾一則宦業方新他日自有後死者傳之矣

門人

何流清校字  
喬如岱

嵩書卷之五終